

Fraccion di MEP a cuminsa cu un fraccion nobo

ORANJESTAD – Durante un conferencia di prensa yama pa partido MEP, lider di e partido, alabes lider di fraccion, Sra. Evelyn Wever-Croes, a splica riba e ceramento di aña parlamentario y habrimento di un parlamento nobo. E prome cos cu e lider di MEP a papia riba dje, tabata e gradicimento cu e partido tin pa Sr. Edison Briesen, kende despues di 30 aña di carera politico, a bandona parlamento.

30 AÑA

E ta sigui comenta cu Edison Briesen a ocupa diferente funcion den Eilandsraad y parlamento y tambe den gobierno, specialmente cu e cartera di turismo y ta considera Briesen un pionero riba e tereno aki. Un di esunnan cu a pone e fundeshi con nos turismo a desaroya den e tempo moderno aki. Awor aki Briesen no ta den parlamento mas, sinembargo e ta sigui activo, e ta sigui como un participante activo den e partido y consehero di lider di MEP y di e parlamentarianan. Partido MEP a gradici Briesen y henter su famia pa tur e sacrificionan cu nan a haci pa sirbi Aruba den e

tremendo forma cu el a haci y cu e so sa haci'e. MEP lo haya falta di Briesen, specialmente den parlamento, den e forma pa hiba discursonan y sigur ta un shon di hende, un politico di taya, Croes a expresa. Briesen haya hopi elogio den parlamento, tanto di MEP como di oponentenan pa su sistema di procede den parlamento. Sra. Croes a expresa di ta sinti hopi honra y orguyoso pa tin un hende asina grandi y un peso asina importante den e seno di partido.

7 PARLAMENTARIO

MEP a cuminsa cu un fraccion nobo cu ta consisti di 7 miembro. Segun Wever-Croes, e fraccion a cuminsa reuni y reparti e trabaonan, reparti e areanan riba cual cada ken ta bay desaroya su mes. Con cu bay bin awor aki tin suficiente hende pa reparti e trabaonan, Wever-Croes a expresa. E 7 parlamentarianan ta como lo siguiente: Tin Sra. Xiomara Ruiz-Maduro, kende no ta desconoci pa ningun hende. Esaki ta su di dos periodo den parlamento. Tin Sr. Ady Thijzen, kende ta fungi su di tres periodo den parlamento

kende no ta un desconoci. Tin Sr. Chris Romero, kende a drenta parlamento. Tin Sr. Dangui Oduber, kende no ta un desconoci, sinembargo su prome biaha den parlamento. El a sigui tur e desaroyonan di parlamento pafo. Tambe tin Sr. Glenbert Croes, kende ta bolbiendo bek parlamento, kende tampoco no ta un desconoci. E ya caba experiencia e tin den gobernacion, parlamento y pafo di gobernacion. Sr. Guilfred Besaril ta su prome biaha den parlamento, pero e tampoco no ta un persona desconoci.

Esaki ta e team di MEP, cu ta un team dinamico cu caranan hoben combina cu experiencia y cla pa enfrenta e retonan nan dilanti, Wever-Croes a expresa.

VARIOS PUNTO PA CONCENTRA

Fraccion di MEP lo bay concentra riba varios punto durante e temporada di parlamento nobo. E punto di mas importante ta pa hiba un oposicion critico, un oposicion fuerte y na mesun momento treciendo solucionnan. Treciendo alternativa cu a brinda durante

campana caba. Tin un tarea grandi pa reconquista e confianza di pueblo pa asina e partido por crece bek. Y esey nan lo bay haci defendiendo nos pueblo, defendiendo cada ciudadano den cualkier situacion cu nan por ta, special pa evita cu nan ta bira victima di cualkier abuso, segun Wever-Croes.

PROPUESTANAN DI CAMPAÑA

E propuestanan cu a presenta durante campana, nan no ta lubida. Ta bay sigui traha riba nan. Loke ta e proposicion di e hydrocable cu lo sigui traha riba dje pasobra nan sa cu esey ta baha e prijs di awa y coriente. No a scucha ningun otro alternativa cu si ta baha prijs di awa y coriente y ta kere cu esaki ta hopi importante pa baha costo di bida.

CANASTA BASICO

Tambe e ampliacion di canasta basico pa asina bin un miho control riba prijs den supermercado pasobra e no ta husto cu e prijsnan ta fluctua asina tanto. Combati criminalidad ta un punto hopi importante riba lista tambe pasobra e pais aki ta birando mas y mas

insigur y lamentablemente na no lo mira mucho cambio den esaki, mirando cu ta e mesun persona cu ta bay keda encarga cu e cartera di husticia y a demostra caba cu riba e tereno aki el a faya barbaramente.

TRANSPARIENCIA

Compartiendo oposicion ta mira esey como e reto di mas grandi, pa percura cu tin transparencia. Esta pa percura pa haci e preguntanan necesario y haya e contesta y informacion di gobierno y pa percura pa e integridad di henter gobernacion y di henter parlamento ta riba un nivel hopi halto, pasobra esey ta refleha bek den comunidad. MEP kier un gobierno mas sincero cu e pueblo y pa gobierno bisa pueblo ora cu ta spera algo na e pueblo.

A weita algun caso manera por ehempel e caso di labamento di placa cu tabata tin un parlamentario involvi cu te dia di awe no a weita kico a para di e caso ey.

Esakinan ta tipo di cosnan cu mep lo sigui enfoca riba dje, pasobra mester elimina tur e tipo di desaroyonan asina, segun Evelyn Wever-Croes. □